

■ DA LA VITA DA LUDMILLA CAHENZLI

Il viertgel da la pasta da dents

Pon ins pretender dad uffants ch'els struvegian in viertgel sin la pasta da dents? Quai ma sun jau dumandada ier saira cura ch'jau sun vegnida en il bogn ed hai chattà la tuba da pasta da dents – averta sco adina. Atgnamain fissan mes uffants vegls avunda da struviar si quest viertgel suenter avair lavà ils dents.

Ma sulet dir e supplitgar na gida schuber-lidi-nüglia-strubas-nagut.

Jau pudess dentant introducir in sistem: Mintga saira, cura ch'jau chatt la tuba averta (pia propi mintga saira) en il bogn, chatsch jau in da mes uffants or da letg e fatsch metter si il viertgel sin la tuba. Mintga giada vegniss in auter londervi. I giess en in turnus, fin ch'els han tuts trais chapè, ch'in viertgel d'ina tuba da pasta da dents tutga sin la tuba e nagliur auter. Ma quai è bler memia stentus. I dat stress mintga saira e lura stuess jau anc tegnair endament tgenin dals uffants ch'è londervi cun struviar si il viertgel. Na.

In'otra idea fiss da stritgar a tuts

per mintga tuba averta 10 raps dals daners da satg. In chastì collectiv. Quai è adina bun perquai ch'igl è uschè malgist.

Tup è dentant ch'i tutgass puspè ina giada il pli fitg la pitschna. 10 raps tar ella fa gia 10 pertschient dals daners da satg. Set tubas avertas en ina emna faschessan gia 70 pertschient dals daners da satg. Per la gronda fissan 70 raps dentant be ca. 10 pertschient. Jau stuess inventar in sistem dad incassar ils raps sco tar la progressiun da taglia.

Abah, tut quests chastis èn bler memia cumplitgads. Jau na fatsch schuber-lidi-nüglia-strubas-nagut, hai jau pensà. Tut levgiada hai jau bandunà il bogn cun sia pasta da dents e ses viertgel sin l'ur dal lavabo.

E sche la tuba n'è betg sa serrada da sezza, è ella anc adina averta.

Ludmilla Cahenzli

P.S. Nun che mes um Eugen vess gì compassiun cun la pasta che setga vi.